

DATOZEN BOST URTEETAKO LEHENDAKARIA AUKERATZEKO HAUTESKUNDEEN BIGARREN TXANDA EGINGO DA GAUR

Alberto Fujimori bere buruarekin lehiatuko da, aurkari eta begiralerik gabe

■ Alejandro Toledok Alberto Fujimoriaren gain utzi du «herrialdeak jasango duen krisiaren erantzukizuna»

■ Nazioarteko eta Peruko begiraleek ez dute zainduko bozketa eguna eta ondorengo boto zenbaketa

■ Gaur bozen bigarren itzulia eginez gero, Peru zigortua izango dela ohartarazi du EEBBetako Gobernuak

Erredakzioa / Donostia

HAUTESKUNDE eguna da gaur Perun, nahiz eta demokraziako arauetako bat bete ez den: hautagai aniztasuna. Pertsona bakarra lehiatuko da gaur Lehendaritza lortzeko. Alberto Fujimori presidentea da hori, eta beraz, herritarrek badakite datozen bost urteetan Fujimori izango dutela agintari.

Alejandro Toledo oposizio-ko hautagaia erretiratu egin da hauteskunde prozesutik. Apirilaren 9an egin zen lehen itzulian egondako irregularitasunak ez direla zuzendu arrazoitu du. Lehen txanda horretan Fujimoriaren atzetik geratu zen Toledo, HEN Hauteskundeetako Epaimahai Nazionalak emandako datuen arabera: Fujimoriarentzat izan ziren botoen %49,84 eta Toledorentzat %40,31.

Bietako inork ez zituen lortu botoen %50. Kopuru hori ezinbestekoa zen lehendakaria aukeratua izateko, eta horregatik, bigarren txandaren zain geratu zen erabakia.

Toledok nazioari mezua irakurri zion herenegun gauean. Hor Fujimori kritikatzen esanez bere erantzukizuna izango dela bigarren itzulia eginez gero Peruk jasango duen «krisi ekonomiko eta sozial larria». Fujimori-



MARTIN MEJIA / AP

Limako Unibertsitateko ikasleak Alberto Fujimoriaren aurka protesta egiten.

ren erregimena «botereari eutsi nahio dion diktadura» dela esan zuen Toledok.

«Legez kanpokoa»

«Bigarren txanda legez kanpokoa da eta mundu osoak gaitzetsia», esan zuen. «Gaur erabakiko den gobernu legez kanpokoa, ilegítimoa eta ezegonkorra izango da».

Baina Fujimori bakarrik lehiatzeaz gain, prozesua

gainbegiratzeko begiralerik ez da izango Perun. OEA Amerikako Estatuaren Erakundea zen lekuko ofiziala, eta horrek herenegun utzi zuen lurraldea. Bozak «libreak eta justuak» izateko baldintzarik ez zegoela adierazi zuen Peru utzi baino lehen.

Ildo horretan mintzatu ziren herenegun EEBBetako Carter Zentroa eta Institutu Nazional Demokrata, Europako Batasuna, Amnesty In-

ternational eta Gardentasun eta Bakearen aldeko Batzordea erakunde peruarra.

Haratago joan zen EEBBetako Gobernuak. Bigarren itzulia eginez gero bi herrialdeen arteko harremanak gaitzotu egingo direla esan zion Washingtonek Limari, baita zigorrekin aurre egingo beharko diela ere. Nazioarteko zuzenbideko adituen arabera, ordean, inork ezin du Peru zigortu.

soslaia

ALBERTO FUJIMORI

Peruko presidentea



Sasidiktadorea

Alberto Fujimori inork gutxi ezagutzen zuen Perun 1989 baino lehen. Nekazaritza ingeniaria eta Matematika masterduna, orduan egin zen eza-guna politikaren alorrean. Urtebete geroago bihurtu zen lehendakari.

Inflazioari aurre egiteko plana abiarazi zuen. Sindikatuek eta Legebiltzarrak aho-tsa altxatu zioten segituan. Babesa baztertu zion Legebiltzarrak, baina horrek ez zuen kezkatu. Dekretuz agintzen jarraitu zuen, eta 1992an auto-estatu kolpea egin zuen Armadaren laguntzarekin.

Sendero Luminoso eta Tupac Amaru Mugimendu Iraultzailearen aurkako borroka hartu zuen Gobernuaren helburu nagusitzat, eta horri esker 1995eko hauteskundeak irabazi zituen. Bigarren agintaldia hasi zuen. Hirugarrena abiatzeko aurkeztuko da gaur, nahiz eta Konstituzioak dioen pertsona batek ezin dela bitan baino gehiagotan presidente izateko aurkeztu.

Diktadore gisa agintzen du Fujimorik, askoren iritziz. Gainera, agintearen atzean militarren eskua ikusi dute askok.

EUSKO JAURLARITZA		GOBIERNO VASCO
HIZKUNTZA ESKOLA OFIZIALA GETXO		ESCUELA OFICIAL DE IDIOMAS GETXO
1999-2000 IKASTURTEKO AZTERKETA LIBREEN HASIERA		
OINARRIZKO ZIKLOA:		
• Euskera – Maiatzaren 30ean (3 deialdi): 9etan, 12etan eta arratsaldeko 4.30etan.		
• Ingelesa – Ekainaren 12an (2 deialdi): 10etan eta arratsaldeko 3.30etan.		
• Frantsesa – Ekainaren 6an .		
GOI ZIKLOA:		
• Euskera – Ekainaren 15ean (Lehengo deialdia) eta ekainaren 19an (Bigarren deialdia).		
• Ingelesa – Ekainaren 22an .		
• Frantsesa – Ekainaren 21ean .		
Derrigorrezko da N.A.N. eta eskolako karneta ekartzea.		
Ez da onartuko konbokatoria aldaketarik.		
Argibide gehiago nahi izatekotan eta zenbait deialdiko konbokatorien azterketarako begira ezazu zentroan bertan dagoen « azterketen egutegia » edo bestela 944 647 222ra deitu.		



**Kultura Sailak diruz
lagundutako egunkaria**